

Желтоқсан көтерілісінің ашылмаған күпиясы көп



4-БЕТ

Ержан НАУРЫЗБАЙ, «Adai Zaman» саяси партиясының бастамашысы:

«Жемқорлықпен күрестің жалғыз жолы - өлім жазасын енгізу»



6-БЕТ

Мидағы «қош таяқшасы»



8-БЕТ



• СҰХБАТ

Азамат ЕСҚАРАЕВ, Қазақстан Республикасының Әділет министрі:

«ҚҰҚЫҚТЫҚ АҚПАРАТТАР БАРЛЫҚ АЗАМАТ ҮШІН ҚОЛЖЕТІМДІ»

Бүгінгі таңдағы аса өзекті мәселенің бірі азаматтардың құқықтық сауаттылығы мен мәдениетін арттыру болып табылады. Осы бағытта Әділет министрлігі тарапынан қандай жұмыстар жүзеге асырылуда? Құқықтық салада енгізіліп жатқан жаңа жобалар қарапайым халық үшін қаншалықты қолжетімді? Министр А.ЕСҚАРАЕВ ПЕН болған сұхбатта осы және басқа да сауалдарға жауап іздеп көрген едік.

– Азамат Несіпбайұлы, арнайы уақыт бөліп, сұхбат беруге келісім бергеніңіз үшін алғыс білдіремін. Бүгін біз азаматтардың құқықтық сауаттылығын арттыру шаралары туралы әңгіме өрбітсек. Әрине, мұның елдегі құқық үстемдігін нығайтуға тікелей әсер ететіні белгілі. Әділет министрлігі осы бағытта қандай жұмыс жүргізіп жатыр?

– Расында да, азаматтардың құқықтық процестерге белсенді қатысуынсыз құқықтық мемлекет құру мүмкін емес. Әркімнің өз құқықтары мен міндеттерін түсінуі, құқықтық салада өз мүдделерін қалай қорғау керектігін білуі маңызды. Бұл мәселені Мемлекет басшысы да бірнеше рет көтеріп, құқықтық сауаттылықты арттыру және заң мен тәртіпті мүлтіксіз сақтау қажеттілігіне баса назар аударған болатын.

Әділет министрлігі жалпы құқықтық түсіндіру жұмыстарын үйлестіреді. Алға қойылған мақсаттарға жету жолындағы жұмысты бірнеше бағытта жандандырып, жүзеге асыруда. Біріншіден, қолданыстағы заңнамаға да, актілердің жобаларына да жалпыға бірдей қолжетімділік қамтамасыз етіледі. Бұл үшін «Әділет» ақпараттық жүйесі және Заңнаманың эталондық бақылау банкі жұмыс істейді. Адамдар қолданыстағы кез келген заңды онлайн, ақысыз қарап, зерттей алады. Ал нормативтік құқықтық актілердің жобаларын «Ашық НҚА» платформасында қадағалап, оларды талқылауға қатысуға болады.

(Соңы 5-бетте)

ЗАҢ газеті

✉ zangazet@mail.ru

№97 (3726)
20 желтоқсан 2024



ZANMEDIA.KZ

Қоғамдық-саяси, құқықтық газет

• БҮГІНГІНІҢ БАС ТАҚЫРЫБЫ

БАЛАЛАР НЕГЕ СПОРТҚА ҚЫЗЫҚПАЙДЫ?



Экономика дамып, технология жетілген сайын дене белсенділігі азайып бара жатыр. Деректер 2022 жылы бүкіл әлем бойынша ересектердің үштен бір бөлігі, яғни 31 пайызының ғана дене белсенділігінің тиісті деңгейде екенін көрсетеді. Бірқатар елде бұл көрсеткіш 70 пайызға жетуі мүмкін. Мұның салдары жүрек-қан тамыры ауруларының, кант диабетінің және қатерлі ісік ауруының дамуына әкеледі. Бұл жөнінде Оқу-ағарту министрлігінің Ұлттық ғылыми-практикалық дене тәрбиесі орталығы мен Назарбаев университетінің Медицина мектебі бірлесе өткізген халықаралық ғылыми-практикалық конференцияда мәлім болды.

(Соңы 3-бетте)

• БАЗЫНА

МЕМЛЕКЕТТІК ҚЫЗМЕТКЕРДІҢ МЕМЛЕКЕТТІК ТІЛДІ БІЛУІ МІНДЕТ

Қазақстанның өз тәуелсіздігін жариялағанына 33 жыл болса да, билік органдары әлі күнге толықтай мемлекеттік тілде сөйлей алмай жүр. Ата Заңның 7-бабының 1-бөлігінде «Қазақстан Республикасындағы мемлекеттік тіл – қазақ тілі» деп көрсетілгенімен, «мемлекеттік ұйымдарда және жергілікті өзін-өзі басқару органдарында орыс тілі ресми түрде қазақ тілімен тең қолданылады» деген заңның екінші бөлігі әлі күнге кедергі болып келе жатыр.

Осы олқылықты түзетуге табандылық таныта алмай келеміз. Соның нәтижесінде Қазақстандағы тілдердің қолданылуының құқықтық негізін, мемлекеттің оларды оқып-үйрену мен дамыту үшін жағдай жасау жөніндегі міндетін белгілейтін «Тіл туралы» заң солқылдақ. Мемлекеттік, мемлекеттік емес ұйымдар мен жергілікті өзін-өзі басқару органдарының қызметінде тілдерді қолдануға байланысты туындайтын қоғамдық қатынастар осы заң реттейтін мәселе болғанымен, оның күші

әлсіз. Осы заңның 4-бабында «Мемлекеттік тіл – мемлекеттің бүкіл аумағында қоғамдық қатынастардың барлық саласында қолданылатын мемлекеттік басқару, заң шығару, сот ісін жүргізу және іс қағаздарын жүргізу тілі». Мемлекеттік тілді меңгеру – Қазақстан Республикасының әрбір азаматының парызы. Алайда мемлекеттік тілді меңгеру ешкімге міндеттелмегендіктен, мойнындағы парызының қарызын өтемей жүргендер қарапайым халық арасында ғана емес, мемлекеттік

басқару, заң шығару, сот ісін жүргізетін билік органында жеткілікті.

Мемлекеттік тілді меңгермегендерді биліктен аластату керек пе?

Бұл әрине, бір қарағанда мемлекеттік тілді білмейтіндер үшін қатал үкім болып көрінуі мүмкін. Бірақ мемлекеттік тілдің Қазақстан халқын топтастырудың аса маңызды факторы екенін ескерсек, бұл өзін-өзі ақтайтын шешім. Өйткені мемлекеттік тілді меңгеруге селкостық танытқан мемлекеттік қызметкерлерді ақтап алу мүмкін

емес. Тіпті бір кездері түрлі себеппен қужаттарда қате жазылып кеткен аты-жөнін дұрыстап, сауатты жазуға немқұрайдылық танытатындар бұқаралық ақпарат құралдарына берген сұхбаттарында ғана емес, өзі қолымен жазып, жіберген материалдарында бұрмаланып жазылған аты-жөнін көрсетуден еш қысылмайды. Кейбіреу тіпті мемлекеттік тіл туралы кәсіле сөйлеп, төгілте жазғанда «мына кісі тілге байланысты ұстанымын өз жөнін қазақшалаудан бастаса ғой» дейсің еріксіз бас шайқап. Олар өз қызметін жүзеге асыруда мемлекеттік тілге емес, мемлекеттік ұйымдарда және жергілікті өзін-өзі басқару органдарында ресми түрде қазақ тілімен тең қолданылатын орыс тіліне басымдық береді.

Сондықтан қызмет көрсету мекемелеріндегі байланыс орталықтарына хабарласқан кезде қайтарылатын жауап міндетті түрде екі тілде әзірленеді. Мемлекеттік тілде сөйлейтін адам оның бәрін тыңдау үшін қосымша уақыт жоғалтады. Тіпті халыққа қызмет көрсету орталықтарында бастап, түрлі бағыттағы ұйым, мекемелерде өтініш тоқтыру кезінде қызметкерлердің бірден мемлекеттік тілдегі емес, орысша жазылған үлгілерді ұсынуы қалыпты дүние секілді боп кеткен.

(Соңы 3-бетте)

